

GÁLATAS

Pablo queédih ã túyat tútat

1-2 Weém, Pablo, biíhdih daacát túttnit, yeéb Galacia baácdih jumni tútchinadih moón Jesúíhwādh wā wahna caá. Nihat wājeéh jumnit Jesúíhwābut yeebdíh ã túyat túttna caá. Weém, Pablodih jīí Jesucristo ã níwip jī, áih táini doonádh wā naóh jib bohéat pínah niijná. Cāacwā weemdíh ã naáwát tútcap jī. Obohjeéhtih, Jesucristo, Dios jwī íp caán wānnijidih boonanibut weemdíh ã níwip jī. Páant ã naáwát túttni jumna, nin náodih yeebdíh wā daác wahna caá. ³ Dios jwī íp, jwī Maáh Jesucristobut yeebdíh oinit, ã túi teo wáaca naáh, ñi túi jumat pínah niijná. ⁴ Dios jwī íp ã náahat pahjeh, caán Jesucristoboó jwī yéejat jíib, át wun wūhup wut jī,* ã teo wáacatjīh yeejépwā ã jumat pah nihcan, yéej chājatdh jwī yap yohat pínah niijná. ⁵ Páant ã chājatdh jéihna, “Paá, meém nihatdh jéih beedáni jumna, cāacwādh jīgah ennit, mapí túi teo wáacna caá”, jwī ípdih yeó jáap jumat pah búdí jwī níj wēi naáwát dée caá. Páant tíí jwī níj wēi naáwáp.

Dios cāacwādh ded pah ã túi ubat

⁶ Yeéboó ded pah ñi chājat doonádh joinít, weém búdí wā náhni dahwana caá. Dios yeebdíh búdí oina, át níwip taga, Jesúsdh jepahnit, áihwā ñi jumat pínah niijná. Obohjeéhtih, páant yeebdíh

* **1:4** Mt 20.28; Mr 10.45; 1Ti 2.6; Tit 2.14

búdí ã oyochah yuhna, waícanjeh biíh bohéatdih joinít, Jesucristoboodíh cádahna caá ñi chãjap. Páant ñi cádahat doonádih joinít, “¿Dépanih tigaá waícanjeh ï túut nuúm?” niíj jenah joinít, wã wáhi bejep be. ⁷ Biquína ñi pebh jumnit, yeebdíh tac buugána, mácah bohénit, Jesúíh táini doonádih ï yéejana caá. Páant yeebdíh naóhna, nin pah ï niíj yee bohéna caá: “ ‘Túi abnit jummat túut niijná, Jesucristodihjeh ñi túi jepahaá’, Pablo niíj naóh bohéna, yeebdíh ã nih yána caá. Diosjeéh tái jummat túut niijná, jwí nuowã ï naáwátjidihbut túi jepahat caá náahap”, ït niíj yee naáwáp wat be. Obohjeéhtih, “Nin táini dooná caá”, ï niíj naóhniboó táini dooná yoobát nihcan caá. ⁸ Jwiít, Dioíh ángel japmant jãóhni, yeebdíh jwí jwíih bohéatjidih mácah jwí bohénachah, jwiít dih Dios búdí peéh chãjna, iiguípna ã waha naáh. ⁹ Wã naáwátji pah wã jwúub naóhbiipna caá, páant muntih: Yeebdíh jwí jwíih bohéatdih ñi túi jepahachah yuhna, det yeebdíh mácah ï bohénachah, Dios queétdih búdí peéh chãjna, iiguípna ã waha naáh.

¹⁰ Páant niijná, “Caánboo tigaá túi bohéni ã jumap”, weemdíh cãacwã ï niijátdih wã bidcan caá. Obohjeéhtih, Diosboó weemdíh “Meém ma túi bohéna jíi”, ã niijátdihjeh caá wã náahap.* Cãacwãdih weñáhnit bohéna, Cristoboodíh wãta weñacan tagaá. Pánih weñacan, caandíh teo wãhni wãta jumcan taga.

Cristo Pablodih ded pah ã túut nuumátji

¹¹ Wã déewã panihnitá, nindih ñi jéihyat pínah yeebdíh wã náah yacna caá: Wãpí bohéni táini

* 1:10 1Ts 2.4

dooná cãacwã ï jengah joyátjijeh nihcan beé. ¹² Ded cãacdih wã joiníji doonábət nihcan beé. Bitaweemdíh ï bohécan beé. Obohjeéhtih, Diosjeh weemdíh ded pah ã wãúh ã jumatdih ã bohénap jĩ.

¹³ Jesucristodih wã jepahat pínah jãtìh, jwiít judíowã jwĩ ñowã ï naáwátjidih wã túi joí waadánap jĩ. Pánih túi joí waadáni wã jumachah, ded pah wã chãjatji doonádih yeéb ñit joijí tagaá. Pánih jumnit, Jesúíhwã Diosdih yap yohnit ï jumatdih jengah joinít, eníhcan, búdí yeejép chãjna, queétdih wã túi mao beedá bojíhip yuh jĩ.* ¹⁴ Jwĩ ñowã ï naáwátjidih túi jepahíhna, weém bíic yoobó behnit chah wã túi bohénap jĩ.*

¹⁵⁻¹⁶ Obohjeéhtih, wã cãac jummat pínah jãtìh, Dios weemdíh búdí oina, átát ñíojip taga, ãih túini doonádih wã bohéat pínah niijná. Pánihna, yéejni wã jumachah yuhna, ã náahni yeó jáapdih Jesús ã wahniji ã jumatdih weemdíh ã jéihyanap jĩ. Pánih jéihyanit, judíowã nihcannit pebhboó ã wahap jĩ, ãih túini doonádih queétdih wã naáwát pínah niijná. Páant ã wahachah, “¿Ded pah tigaá weemdíh niij bohéat náah?” cãacwãdih wã niij úbh joí encap jĩ.* ¹⁷ Jesús ãih túini doonádih naáwát túutnit maáta, wã jãtìh ã ñíonit ï jumachah yuhna, Jerusalén tútchina queétdihbət míic wéhenadìh wã bejcap jĩ. Caanná bej jwuhcanjeh, Dios ded pah weemdíh ã náah yacatdih jéihíhna, Arabia baác cãac wihcapboó caandíh úbhúdh wã bejep jĩ. Caánboó jumniiji Damasco tútchina wã jwúbh juibínap jĩ, páant muntìh.

* **1:13** Hch 8.3; 22.4-5; 26.9-11 * **1:14** Hch 22.3 * **1:15-16** Hch 9.3-6; 22.6-10; 26.13-18

18 Biíc peihcanni jópchi túttimah, Jerusalén tútchina Pedroh enedih wã bejep jĩ buca.* Caanná chéne semanabitjeh wã jumup jĩ. 19 Jesús ãih doonádih ã naáwát tútnit bita maátadih wã jwãáhcap jĩ. Obohjeéhtih, Santiago jwĩ Maáh úddih pohba wã jwãáap jĩ. 20 Páant wã daacáchah, wã naáwát yoobópdih ã jumatih Dios ã jéihna caá.

21 Túttimah, Siria baác, Cilicia baácnaabut naóh jibidih wã bejep jĩ. 22 Caanná wã jib bejehah, Judea baácboó jumnit Jesúhwã weemdih ã jwãáh jwuhcap jĩ. 23 Ded pah wã chãjat doonádihjeh ítát joyóp tajĩ. “Jãtuh jwiít Jesúhwãdih yeejép chãjna, túini doonádih jwiítidih cádahat tútniji buu caán doonádihjeh jwúb naóhna caá ã chãjap, cáacwã Jesúdh ã jepahat pínah niijná”, ít niij míc wéhenap wut jĩ. 24 Páant wã túut numát doonádih joinít, “Paá, caandih mat túi teo wáacap taga”, Diosdih búdí ít niij wëi naáwáp wut jĩ.

2

Cristo ã naáwát tútnit maáta Pablodih ã wëi jwãáát

1-2 Catorce jópchi túttimah, Diosboó weemdih Jerusalén tútchina ã bejat tútuchah, Bernabéjĩh caanná wã jwúb bejep jĩ. Pánih bejna, Titodihbut jwĩ numah bejep jĩ.* Caánboó judío nihcanni, jwĩ nuowã ã wutat pah bódcanni ã jumup jĩ. Caanná juibína, caánboó jumnit Jesúhwã ã maátajeh ã míc wáacachah, judiowã nihcannitdih túini doonádih ded pah wã bohéatdih queétdih wã naáwáp jĩ. Pánih naóhni, ded pah wãpĩ bohéatdih queét ã

* 1:18 Hch 9.26-30 * 2:1-2 Hch 11.30; 15.2

túi jéihyatdih wã náah yacap jĩ. Pánih jéihcan, wã bohéatdih ĩ wēicah, wã tewat bũudní āta jum taga. Obohjeéhtih, ded pah wã bohéatdih jéihnit, ĩ túi weñep jĩ. ³ Páant wã naáwáchah wēi joiná, Tito bóodcanni ā jumuchah yuhna, “Meembát ma bóodat túutú”, caandíh ĩ niijcáp jĩ. ⁴ Queét maáta biíc dih jwĩ míic wéhe láa, jwiít Jesúíhwã nihat biíc dih jwĩ míic wáacachah, biquína “Jesúsdih jepahnit jwĩ jumna caá”, niij yeenitbut ĩt waadáp jĩ. Pánih waadnít, judíowã nihcannitdihbut ĩ bóodat túutap yuh jĩ. Obohjeéhtih, bũu Jesúíhwã jumna, jwĩ nuowã ĩ naáwátjidih jepahcan, Jesúsdihjeh jwĩ túi jenah joiná caá. “Páant jwĩ chājachah, jwĩ íipboó jwiít dih ā túi enna caá”, jwĩ niij jéihna caá. Páant niij jéihnit jwĩ jumuchah enna, jwiít dih jũihñat túut niijná, ded pah jwĩ chājatdih jéihíhna, queét jwĩjeéh ĩt waadáp tajĩ. Pánih waadnít, jwĩ nuowã ĩ naáwátji biíc yoo bó jwiít dih ĩ jepah beedáat túutap yuh jĩ, páant mantih. ⁵ Páant ĩ wutachah yuhna, túini doonádih ñi jéihyat pínah niijná, jwiítboó queétdih jwĩ jepahcap jĩ.

⁶ Pánihna, Jesúíhwã ĩ maáta túini doonádih ded pah wã bohéatdih joinít, “Ma bohéat pahjeh tih judíowã nihcannitdih ma bohénaá”, niij naóhnit, weemdíh biíh wutatdih ĩ bohéat túutcap jĩ. Queét Jesúíhwã ĩ maátadh “Queétboó chah jéihnit caá”, biquína ĩ niij jenah joyóchah yuhna, dedé pínah weemdíh nihcan caá. Diosboó nihatdih biíc yoo bó ā jenah joiná caá.* ⁷ Queét ded pah wã bohéatdih túi wēinit, “Pedrodih jwiít judíowãdih ā bohéat pínah niijná, Dios āt ñíoqip taga. Pánihat pah,

* 2:6 Dt 10.17

Pablodihbut judíowã nihcannitboodíh át bohé jibat tútup taga”, í míc niijíp jĩ. ⁸ Judíowãdih Pedro ã bohénachah, Dios búdí át teo wáacap wut jĩ. Weembút judíowã nihcannitdih wã bohénachah, Dios biíc yoobó ã teo wáacachah, queébtut í táí jepahap jĩ.

⁹ Pánihna, Santiago, Pedro, Juanjĩh, Jesúíhwã í maáta yoobát, Dios weemdíh búdí ã teo wáacatjidih jéihnit, “Dios yoobópdih át ñío wahap taga, jwĩ déewã nihcannitdih ã naáwát pínah niijná”, í míc niijíp jĩ. Páant niijnít, weemdíh Bernabédihbut búdí wěnit, “Jwĩ táí míc teo wáac jĩh”, niijná, jwĩ míc m̄aj tewep jĩ. Pánih m̄aj teonit, “Yeéb jwĩ déewã nihcannitdih ñi bohéatji pah ñi táí naáwá. Jwiitboó jwĩ déewãdihjeh jwĩ naóhbiipna caá”, Santiagowã jwiitdih í niijíp jĩ. “Páant tií ã jum̄ nah”, jwĩ míc niijíp jĩ. ¹⁰ Páant niijná, Jesúíhwã moh yéejnitdih jwiitdih í teo wáacat tútup jĩ. Weembút moh yéejnitdih búdí jĩgah ennit, wãpĩ teo wáacna caá. Páant niij míc wéhe péanit, jwiit Antioquía tútchina jwĩ jwúub bejep jĩ.

Pablo Pedrodih ã jũihñat

¹¹ Túttimah, Pedrobut Antioquía tútchiboó ã juibínap jĩ. Obohjeéhtih, jwĩ pebhna juibíniji, yoobópdih ã chãjcat peéh caandíh wã jũihñap jĩ. ¹² Nin pah ã chãjap jĩ: Jwĩ nuowã “Jwiit judíowã bóodcannit biícđih jwĩ jeéméchah ã táican caá”, í niijátji ã jum̄chah yuhna, Pedroboó jwĩ pebh jwíih juibína, jwĩ déewã nihcannit biícđih ã táí míc wěp jwuhup jĩ.* Obohjeéhtih, biquína jwĩ déewã, Santiago ã chéenwãboó í juibínachah ennit, jwĩ déewã

* 2:12 Hch 11.2-17

nihcannitdih cádahnit, Pedroboó “Buu jwinít bóodat túttnit weemdíh jūihná”, niijná, ĩjeéh ã jwúub míc wēpcap jĩ. ¹³ Páant ã yee buugúchah ennit, bita jwĩ déewābut caandíh míc jéih ennit, queétbut biíc yoobó ĩ cádahap jĩ. Bernabé yah buca túi jéihni jumna yahna, queét ĩ chājat biíc yoobó caanbút ã cádahap jĩ. ¹⁴ Pánih cádahnit, “Nihat Jesúsdiheh jepahnitdih Dios biíc yoobó ã wēi enna caá”, ĩpĩ niíj bohéat pah queét ĩ cádahap jĩ. Páant ĩ cádahachah ennit, nihat Jesúihwā ĩ joyóchah, nin pah Pedrodih wā niíj jūihñap jĩ: “Meém judío jumna yahna, Jesucristodih jepahna, jwĩ nuowā ĩ naáwátjidih ma túi jenah joí cádahap jĩ. Pánih cádahnit, judíowā nihcannit ĩ chājat pah queét biíc diih ma túi jeémp jwuhap be. Obohjeéhtih, buu queétdih cádahnit, jwĩ nuowā ĩ naáwátjidih ma jwúub jepahachah ennit, queét jwĩ déewā nihcannit nin pah ĩ niíj jenah joiná nacaá: ‘Pedro páant ã jwúub jenah joyóchah, queét judíowā ĩ nuowā ĩ naáwátjidih jwiít dihbut jepahat caá náahap’, ĩ niíj jenah joiná nacaá. Páant ma chājat ã túican caá”, Pedrodih wā niijíp jĩ.

Jesúsdih túi jenah joinít diih Dios ã wēi enat

¹⁵ Jwĩ nuowā judíowājeh ĩtát jumap tajĩ. Pánihna, jwiítbut ĩ juméná judíowājeh mantih jwĩ jumna caá. Pánih jumnit, Dios ã wátat diih jéihnit jwĩ jumna caá. Obohjeéhtih, queét judíowā nihcannit Dios diih ĩ jéihcan caá. ¹⁶ Pánihna judíowā jumna yahna, caán wátat diih jwĩ jéih jepah beedácat diih jwĩ jéihna caá. Caandíh jepahcat jíib “Queét táinit caá”, jwiít diih Dios ã niíj encat dihbut jwĩ jéihna caá. Obohjeéhtih, Jesucristodihjeh túi jenah joinít jwĩ jepahat jíib, “Queét táinit caá”, Dios jwiít diih ã

niij enna caá. Pánih jéihnit, jwiít judíowã yuhna, Jesucristodihjeh túi jenah joinít, jwĩ jepahap jĩ, “Queét túinit caá”, Dios jwiít dih ã niij enat pínah niijná. Jwiít cãacwã Moisés ã wutatjidih jéih jepah beedácanit míic jwĩ jumna caá. Pánihna, caandíh jwĩ jepahcat jíib, “Queét túinit caá”, Dios ã niij encan niít. Caandíh jéihnit, “Caán wutatdih joi waadánachah, Dios jwiít dih ã túi wēi enna caá”, jwĩ niij jenah joicán caá.*

¹⁷ Pánihna, Cristodih jepahnit, “Queét túinit caá”, Dios jwiít dih ã niij enat pínah niijná, caán wutatdih cádahna caá jwĩ chājap. Obohjeéhtih, páant jwĩ cádahachah ennit, bita jwĩ déewã caán wutatdih túi jepahat túutnitboó “Queét jwĩ déewã nihcanit pah yéej chājnit ĩ jumna caá”, jwiít dih ĩ niij jenah joiná caá. Páant ĩ niij jenah joyát pah jwiítbut jenah joinít, “Moisés ã wutatjidih cádahat túutnit, Cristo jwiít dih ã yéej chājat túutna caá”, jwĩta niij jenah joi tágaá. Obohjeéhtih, páant nihcan caá. Pánihna, “Jesucristodih jepahna, Moisés ã wutatjidih jwĩ cádahat jíib, yéejnit jwĩ jumna caá”, jwĩ niij jenah joicán caá. ¹⁸ Cãacwãdih nin pah wāpĩ niij naóh bohéna caá: “Diosjeéh túi jumíhna, jwĩ ñowã ĩ naáwátjidih jenah joicán, Jesucristoboodíhjah túi jenah joinít, jepahat caá náahap”, wã niijná caá. Obohjeéhtih, páant niij bohéniji jwúub túut ñuumnit, “Diosjeéh túi jumat túut niijná, jwĩ ñowã ĩ naáwátjidih túi jepahat caá náahap”, niij naóh bohéna, yéej chājni yoobát wāta jum tagaá. ¹⁹ Moisés ã wutatjidih weémboó túi jepahcanni jumna, caandíh yap yohni wã jumna caá.

* **2:16** Sal 143.2; Ro 3.20,22

Pánih yap yohni wã jumatdih jéihna, “Caandih wã jepahcat jíib, Dios weemdih ã wëi encan caá”, wã niij jenah joiná caá. Páant niij jenah joinít, Dios biícdih túi jumát túut niijná, caán wutatdih jenah joí cádahnit, Jesucristoboodíhjih túi jenah joinít, wã jepahna caá. ²⁰ Caánboó weemdih oinit, wã yap yohat peéh cruzboó ã wun wũhuchah, weembút ãjeéh biícdih wunni pah wã jumna caá. Pánih wunni pah jumna, weém wã jenah joyát dihjih chãj cádahnit, Cristoboodíh túi jenah joinít, jepahna caá wã chãjap.* ²¹ Pánihna, “Dios jwiít dih búdí ã oyochah, Cristo ã wun wãhat dedé pínah nihcan caá”, wã niijcán caá. Obohjeéhtih, Dios ã wutatdih jepahat jíibjih ãjeéh jwí túi jumuchah, Cristo ã wun wãhat dedé pínah ãta nihcan tagaá.

3

Jesucristodihjih jepahat caá náahap

¹ ¡Yeéb Galacia baácdih moón Jesúihwã jenah joicánnit ñi jumna caá! Jesucristo cruzboó ã wun wãhat doonádih yoobópdih yeebdíh wã naáwáp jĩ. Páant wã naáwát dih ñi túi jepahachah yuhna, bũũ ¿Dépanih tigaá bitaboó yeebdíh mácah ã naáwáchah joinít, ñi jepah? ² Nindih wãát jenah joí en tigaá: ¿Moisés ã wutatjidih ñi jepahat jíib niít Túini Espíritu ñijeéh át jwíih jum? Nihcan caá. Obohjeéhtih, túini doonádih joiná, Cristodih túi jenah joinít, ñi jepahachah, ñijeéh át jwíih jumap be. ³ Túini Espíritu ã teo wáacatjĩh Cristodih ñi jwíih jepahna yuhna, ¿Dépanih tibeé bũũ jwúub túut nũũmnít, ñi jenah joyátjĩhjih Moisés ã wutatjidih

* 2:20 Fil 1.21

jepahna caá ñi chãjap? Pánih chãjna, jenah joicánnit ñi jumna caá. ⁴ Túini doonádih ñi jepahatji jíib dawá láa túini yeebdíh át yapjip tagaá. ¿Páant yeebdíh ã túi yapatjidih ñi quíib buudá niít? Oboh pohba páant yapna át chãjjican tagaá. ⁵ ¿Ded pah ñi chãjatji jíib tibeé Dios yeebdíh Túini Espíritudih át wũhji? ñi jenah joyóchah. Moisés ã wutajjidih ñi jepahat jíib nihcan, ãih túini doonádih joinít, Cristodih ñi jepahat jíib, yeebdíh Túini Espíritudih át wũhup taga. Páant ã jumuchah, Jesucristodih ñi túi jepahat jíib cãacwã ï jéih chãjca naáhdih Dios ã wẽpatjĩh yeebdíh ã chãj júutat túutna caá.

Abraham Diosdih ã túi jenah joyát

⁶ Bũũ, jwĩ nuo Abraham ded pah ã chãjatjidih jwĩ jenah joyát dée caá. Dios caandíh ã naáwátidih át túi jenah joyóp wut jĩ. “Meemdíh wã túi chãjbipna caá”, Dios ã niijíchah, ã túi jenah joyát jíib, “Caán Abraham túini caá”, Dios caandíh át niij enep wut jĩ.* ⁷ Pánihna, caán Diosdih ã túi jenah joyát pah, jwiítbut páant túi jenah joinít, Abraham ã juimená panihnit jwĩ jumna caá.* ⁸ Judíowã nihcannitbut Diosdih ï túi jenah joyóchah, “Queét túinit caá”, Dios ã niij enna caá. Páant ã niij enat pínahdih jéihna, Dios nin túini doonádih Abrahamdih jãtih átát naáwáp wut jĩ: “Weemdíh ma túi jenah joyát jíib nihat nin baác dih moondíh wã túi chãjbipna caá”, át niijíp wut jĩ.* ⁹ Pánihna, Abraham caandíh ã túi jenah joyóchah enna, Dios caandíh ã túi chãjatji

* **3:6** Gn 15.6; Ro 4.3 * **3:7** Ro 4.16 * **3:8** Gn 12.3

pahjeh, buu láabut det Diosdih túi jenah joinítdih biíc yoobó ã túi chãjbipna caá.

10 Obohjeéhtih, ded “Moisés ã wutatjidih jepahíhna, Dioíh wã jumbipna caá”, niij jenah joinítdih búdí peéh chãjat ã jumbipna caá. Nin pah Moisés ãt niij daacáp tajĩ: “Ded wã wutatjidih túi jepah beedácanndih búdí peéh chãjat ã jumbipna caá”, ãt niij daacáp tajĩ.* 11 Biíh naóh yapani nin pah ãt niij daacáp tajĩ: “Diosdih túi jenah joí, jepahnitboodíh ‘Queét túinit caá’, Dios ã niij enbipna caá. Pánih jepahna, páantjeh Diosjeéh ĩ túi jumbipna caá”, ãt niij daacáp tajĩ.* Páant ã niijátji yoobópdi h ã jumuchah jéihnit, nindihbut jwĩ túi jéihna caá: Ded Moisés ã wutatjidih ã jepahat jíib “Caán túini caá”, Dios ã niij encan niít. 12 “Ded Diosdih túi jenah joiní, ã jepahachah, ‘Caán túini caá’, Dios ã niij enbipna caá. Ded weemdíh Dios ã wutat tútatjidih túi jepah beedánijeh Dios biíc di h ã túi jumbipna caá”, Moisés ãt niij daacáp tajĩ.*

13 Jwiít ni hat caán wutatdih jwĩ túi jéih jepah beedáca h, jwiít di h Dios ã peéh chãjbipna caá. Páant ã peéh chãjat jwiít di h ã jumuchah ennit, Cristoboó caán ã peéh chãjat déedih jíib chãjnit, jwiít di h ãt wun wũhup wut jĩ. Caandíh cruzboó ĩ péoh dodh mawat pínah di h jenah joinít, jon jãt ih nin pah ĩt niij daacáp tajĩ: “Ded máa nah di h ĩ mao yaíhni boó búdí peéh chãjni ã jumbipna caá”, ĩt niij daacáp tajĩ.*

14 Páant ĩ niij daacátji pahjeh tih Cristo nin baácboó ã jumuchah, caandíh ãt yapap tajĩ. Caandíh páant ã yapatji jíib, “Nin baác di h moondíh wã túi chãjbipna

* 3:10 Dt 27.26 * 3:11 Hab 2.4 * 3:12 Lv 18.5 * 3:13 Dt 21.23

caá”, Abrahamdih ã niijátji pahjeh tih jwĩ déewã nihcannitdih Dios át túi chãjap taga. Páant Cristo ã wun wuhachah, caandih túi jenah joinít, jwĩ jepahachah ennit, “Túini Espíritudih wĩih cáacwãdih wã wãhbipna caá”, ã niijátji pah jwiít dih át wãhup jĩ.

Dedé pínah tigaá Moisés ã wutaji

¹⁵ Wã déewã panihnitá, Dios jwĩ n̄o Abrahamdih ded pah ã chãjatjidih yeéb ñi beh joyát pínah niijná, ded pah jwiít cáacwã jwĩpĩ chãjatdih yeebdih wã náhniabipna caá. Jwiít biíhdih nin pah jwĩpĩ niij naóhna caá: “Nin pah meemdih wã chãjbipna caá”, jwĩ niijná caá. Páant jwĩ niijátjidih biíhboó ã jéih jwũb túut n̄mncán niít. “Páant ã niijátji pah ã chãjcan niít”, bitaboó ì jéih niijcán niít. ¹⁶ Caán jwĩ niiját pahjeh m̄ntih, Dios jwĩ n̄o Abrahamdihb̄t nin pah át niij naáwáp wut jĩ: “Weemdih ma túi jenah joyát jíib, nihat baác dih moondih wã túi chãjbipna caá”, caandih, ã j̄imadib̄t át niijíp wut jĩ. Páant niijná, nihat ã j̄imená yoobát dihjeh niijná át chãjcap wut jĩ. Biíc ã j̄ima, túttimah bóo láa j̄mni Cristodih niijná át chãjap wut jĩ.* ¹⁷ B̄m̄ yeebdih wã túi jéihya naóhbipna caá: Jwĩ n̄o Abrahamjidih “Meemdih wã túi chãjbipna caá”, Dios ã niiját túttimah, cuatrocientos treinta jópchi yapat túttimahna Moisésjidih át wut at túutap wut jĩ, ãih cáacwã ì jepahat pínah niijná. Pánih wutna yahna, “Abrahamdih wã jwĩih niijátji pah, túut n̄mncánjeh, biíc yoobó wã péabipna caá”, Dios át niijíp wut jĩ.* ¹⁸ Pánihna, Dios

* 3:16 Gn 12.7 * 3:17 Ex 12.40

biícdih jwĩ táí jumat pínah Moisés ã wʉtatjidih jwĩ jepahat jíib nihcan caá. Páant ã jumuchah nihna, Diosdih Abraham ã táí jenah joyát pah, caandíh jwĩ táí jenah joyát jíib áta nihcan tagaá. Obohjeéhtih, Diosdih Abraham ã táí jenah joyát pahjeh mantih, jwiítbut caandíh jwĩ táí jenah joyóchah, “Yeéb túinit caá”, Dios jwiítidih ã níj enna caá.*

19 Páant ã jumuchah, ¿dépanih tigaá Dios caán wʉtatdih át naóhji? Abrahamdih páant ã níjájti túttimah, caán wʉtatdih át naóhji taga, jwiít cáacwã yéej chājnit jwĩ jumatdih jwĩ jéihyat pínah níijná. Abrahamdih Dios ã naáwátji túttimah, caán wʉtat jwiítidih át jumap jĩ, púú Abrahamji ã juma Cristo cáac jumnit, ã wun wãh láana. Dios ã wʉtatdih áih ángelwãbóodíh Moisésjidih át naóh yapaat túutap wut jĩ. Queét Moisésdih cáacwãdih ít jwúub naóh yapaat túutap wut jĩ.* 20 Caán wʉtatdih Moisésdih ã naóh yapaat túutuchah, Dios caanjéh pohba cáacwãdih át naóhcap wut jĩ. Obohjeéhtih, “Meemdíh táí chājnit, ma jaimajíh ni-hat cáacwãdihbut wã táí chājnipna caá”, Abraham-bóodíh níj naóhna, caanjéh páant át níj naáwáp wut jĩ.

Cristo nihat Moisés ã wʉtatjidih ã péaat

21 ¿Dios Moisésdih ã wʉtatjidih naóhna, Abrahamdih ã níjájtidih “Wã níjájti pah wã péacan níit”, níj níit át chājap? Páant át níjijícan tagaá. Abrahamdih ã níjájti pahjeh biíc yoobó ã péabipna caá. Dios biícdih táí jumat túut níijná, ã wʉtatdih jepahna, caán láa bácah, ã wʉtatjidih jwĩ táí jepah

* 3:18 Ro 4.14 * 3:19 Ro 4.13

beedánachah, dedé peéh chājat jwiít dih āta wihcan tagaá. ²² Obohjeéhtih, jwiít nihat cāacwā yoobó yéej chājnit míc jumna, jwī yéejatdih jwī jéih cádahcatdih Dios naáwátboó ā naóhna caá. Páant jwī jumuchah, Diosdih Abraham ā tái jenah joyát pahjeh mantih, jwiítbut Jesucristodih jwī tái jenah joyóchah, jwiít dih Dios ā tái ubbipna caá.

²³⁻²⁴ BꞰꞰ láa, Dios bíicdih tái jummat túut niijná, ā wahní Cristodih tái jenah joinít, jepahat caá náahap. Obohjeéhtih, Cristo ā jūáwát pínah jātih, Moisés ā wꞰꞰatjidih tái jepahíhna yuhna, yéej chājnit jumna, jwī jéih jepahcap jī. Páant jwī jepahcat jīb, Dios bádí ā peéh chājnit pínah jwī jumꞰꞰ jī. Páant jwī jummatdih jéihnit, jwiít dih tái ubni pínahdih jwī bidip jī. Pánih bidnit, Cristoíh túini doonádih joinít, caandíh jwī jepahap jī, “Queét túini caá”, Dios jwiít dih ā niij enat pínah niijná. ²⁵ Pánihna, Dios bíicdih tái jummat túut niijná, bꞰꞰ Cristodih jwī tái jenah joiná caá. Páant jwī jumuchah, caán wꞰꞰatboó jwiít dih bohéni panihni ā nihcan caá, bꞰca. ²⁶ Jesucristodih jepahnit jumna, yeéb nihat Dios ā weh ñi jumna caá. ²⁷ Cristo ā wꞰꞰpatjīh daabánit jumna, caán bíicdih jwī jumuchah, “Wā wāúh ā jummat pahjeh tih yeebbát ñi jumna caá”, Dios jwiít dih ā niij enna caá. ²⁸ Pánihna, Cristo bíicdih jumna, chéne poómp jwī nihcan caá. Pánih bíic poómpjeh jumna, “ ‘Jwiít judíowā nihcannit, queét judíowādih mácah caá’, Dios ā niij enna caá”, ñi niij jenah joicá bojoó. Teo wāhñit, teo wāhñit nihcannitdihbut; neoná, yaáhdihbut “Nit mácah caá”, Dios ā niij encan caá. Pánihna, yeéb nihat Cristoíhwā jumna, bíic poómpjeh tigaá ñi jumꞰꞰ. ²⁹ Cristoíhwā jumna, Abraham jumimená panihnit

ñi jumna caá. Páant ñi jumuchah, Diosdih Abrahamji ã túi jenah joyát jíib caandih ã niijátji pahjeh mantih, Jesúsdiñ ñi túi jenah joyóchah, yeebdíhbat ã túi chãjbipna caá.

4

Teo wãhñit nihcan, Dios ã weh jwĩ jumat

1-2 Ded pah jwiít cãacwã biih jwĩpĩ chãjatdihbat yeebdih wã jwũub náhniabipna caá. Ded ã íip ã éemp wunat táttimah, ãih bií déedih ãih pínah ã jumuchah yuhna, páantjeh wébít ã jum jwuhuchah, caandih en daonít í jéih yapa jwuhcan caá. Pánih bíboh jwuhcah, caandih en daonít í niiját pah chãjat caá náahap. Pánih jumna, teo wãhñi pahjeh ã jumna caá. Obohjeéhtih, ã íip ã jenahatji láa ã juyúchah, ãih pínahdih caanjéh ã bíbohbiipna caá. ³ Pánihna, jwiít cãacwã Jesucristodih jwĩ jepahat pínah jãtih, caán wébít panihñit jwĩ jum jwuhup jĩ. Pánih jum jwuhñit, jwĩ nuowã ded pah í naáwátjidih yap yohatdih úumna, jwĩpĩ jepahap jĩ.*

⁴⁻⁵ Páant jwĩ jumuchah yuhna, ã jenahatji láa ã juyúchah, Dios ã wũúhdih nin baácna át wah bojjiip taga. Páant ã wah bojni jwĩ wũúh panihñijeh át cãac jumup wut jĩ. Judío wili caandih mi weh jumuchah, Moisés ã wutajjidih caandíhbat túi jepahat át náahap wut jĩ. Jwiítboó caán wutajtidih yap yohnit jwĩ jumuchah, ã weh yoobát jwĩ jumat pínahdih náah yacna, Dios ã wũúhdih át wan wũhat túutup wut jĩ, jwĩ yéejat peéh chãjat déedih ã jíib chãjat pínah niijná. ⁶ Yeebbát ã weh ñi jumuchah, Dios wũúh Jesucristojeéh jumni Túini Espíritudih

* **4:3** Col 2,8,20

yeebdíhbut át wah bojop wut jĩ. Páant ñijeéh jumna, ã teo wáacachah, “Paá”, úumcanjeh Diosdih ñi jéih niijná caá. ⁷ Páניהna, ã weh jumna, buu teo wũhñit panihñit nihcan caá, buca. Páant ã weh yoobát ñi jumuchah, yeebdih búdí ã túi chãjbipna caá.*

Pablo Galacia baácdih moón Jesúthwãdih ã úum yacat

⁸ Jon jãtjeh yeéb Diosdih jéih jwuhcannit jumna, ñi pãpninadih túi jenah joinít, “Nin pah wã chãjachah, caán weemdih ã túi chãjbipna caá”, ñipĩ niíj jenah joyóp yuh jĩ. Pánih chãjñit, Dios yoobát ã teo wáacat pínahdih bidcan, nemépwã ã teo wáacat pínahdih bidna ñi chãjap jĩ. Pánih chãjna, queétdih teo wũhñit panihñit ñi jumap jĩ. ⁹ Pánih jumna yuhna, buu jwuh Dios yoobãdih ñi jéihyechah, caanbút yeebdih ã jéihna caá. Páant caandih jéihna yuhna, ¿Dépanihna buu cáacwã oboh ã jenah joyátjĩhjah ã naáwãtdih ñi jwúub jepah? Pánih jepahna, Diosdih weñaíhna yuhna, ñi bujácã niít. Páant ñi buujácã pínahdih jéihna yuhna, ¿Dépanihna ñi nuowã ã naáwãtdih yap yohatdih úumñit, teo wũhñit panihñit ñi jwúub jum? ¹⁰ Buu Diosdih weñat túut niijná, nin pahbut ñi chãjna yuh caá: Jwiít judíowã jwĩ nuowã ã naáwãtdjih jepahñit, jwĩ wēi láa ded pah jwĩpĩ chãjat pah yeebbút biíc yoobó ñi chãjna caá. “Pánih chãjna, jwĩ túi jumbipna caá”, ñi niíj jenah joiná yuh caá. ¹¹ Páant ñi niíj jenah joyóchah, yeebdih búdí úum yacñit, “Weém queétdih túini doonãdih búdí wã bohénachah yuhna, ¿buudní pínah niít át jumap?” wãpĩ niíj jenah joiná caá.

* 4:7 Ro 8.15-17 * 4:9 Col 2.8,20

12 Wã déewã panihnítá, ñijeéh jumna, yeebdíh bohé láa, weemdíh yeejép ñi chãjcap jĩ. Pánihna, bũũ biíc yoobó weemdíh yeejép chãjcan, nin wã naáwát pínahdih ñi túi jepahaá: Yeebdíh bohénadih bejna, Moisés ã wutajidih jenah joicán, Cristodihjeh yeebdíh wã jepahat túutap jĩ. Pánihna, bũũ Cristodihjeh wã túi jenah joyát pah, yeebbát biíc yoobó ñi túi jenah joyóó. 13 Nindih ñi náhninaá: Tũbit wũnna, ñi pehbóó chão jwúhñit, yeebdíh túini doonádih wã jwíih naáwáp jĩ.* 14 Páant wũnni wã jumuchah yũhna, “Pablo dedé pínah nihcan caá”, niijcánjeh, yeéb weemdíh ñi bacat túutcap jĩ. Pánih bacat túutcan, Dioíh ángeldih, Jesucristodihbut ñi weñat pah, weemdíh ñi túi wēi jwãáap jĩ. 15 Pánih wēi jwãáhñit, nin pah ñi jumajidih wã náhnina caá: Weemdíh búdí teo wáaquíhna, dedé wã náahatdih wũhna, ñíih quíibnadih ñita wãat wũh tagaá. Pánih wēinitji yũhna, ¿dépanih tigaá bũũ wã wihcah, ñi weñatji ã bej? 16 Wã bohénitji jumna yũhna, ¿bũũ yoobópdi h yeebdíh wã naáwátji jíib, weemdíh ñi en jãih niít? 17 Ñi pebhna jubíinitboó “Búdí jwí teo wáacmi caá”, yeebdíh niijná yũhna, ĩ jenah joyátboó mácah ã jumna caá. Páant ĩ niijíchah yũhna, wã bohéatjidih, jwiítidihbut yeebdíh ĩ cádahat túutna caá. Pánih cádahñit, ĩjeéh jumñit, ĩ bohéatboodíh ñi jepahat pínahdih ĩ náah yacna caá. 18 Jwiít cáacwã bita ĩ túi bejat pínahdih yoobópdi h náah yacachah, ãpĩ túina caá. Obohjeéhtih, páant niijná yũhna, mácah jwí jenah joyóchah, ãpĩ túican caá. Ñijeéh jumna, wãpĩ túi teo wáacap jĩ, ñi túi jumajit pínah niijná. Bũũ ñijeéh wihcan yũhna, biíc

* 4:13 Hch 16.6

yoobó ñi túi jummat pínahdih wã náah yacna caá. ¹⁹ Yeebdíh búdí wã oyochah, wã weh panihnit ñi jumna caá. Pánih oinit, yeebdíh búdí wã náhni dahwana caá. Pánih búdí mácah jenah joiná, yad wili mi weép jáaat pah tubani wã jumna caá. Pánih jumna, ded pah Cristo ã jumatji pah yeebbát ñi jummat pínahdih búdí wã náah yacna caá.* ²⁰ Butéh ñijeéh wã jumuchah, áta túi tagaá. Pánih biíc dih jumna, jãihcanjeh naóhmit, yeebdíh wã jéih míc wéhenachah, chah áta túi tagaá. Obohjeéhtih, ninboó jumna, yeebdíh búdí mácah jenah joiná caá wã chãjap.

Agar Sarajĩh ded pah ã jumatji

²¹ Yeéb weemdíh ñi joi jwúhúú. Biquína Diosjeéh túi jumíhna, jwiít judíowã jwĩ ñowã ã naáwátjidih ñi jepahna yuh caá. Caandíh jepahíhna yuhna, ded pah ã naóh daacátjidih ñi túi beh joicán caá. Pánih beh joicánnit ñi jumuchah, nin pah Moisés ã daacátjidih wã naóhbiipna caá, ñi túi beh joyát pínah niijná: ²² Abraham chénewã át weh jumap wut jĩ. Caandíh teo wúhnih Agar biíc mit wúh jumap wut jĩ.* Á áa yoobát Sarabut biíc mit wúh jumap wut jĩ.* ²³ Pánihna, caandíh teo wúhnihboó, jáap wili jumna, Ismael pínahdih mit weh jumap wut jĩ. Obohjeéhtih, “Majeéh bóli, Sara newé weépdih mi weh jumbiipna caá”, Dios Abrahamdih ã niijátji pahjeh, Saraboó tub beh wili jumna yuhna, Isaac pínahdih mit weh jumap wut jĩ.

²⁴⁻²⁵ Queét chénewã yaáhdih ded pah ã yapatji jwiít dih ã túi naóhna caá. Teo wúhnih Agardih

* **4:19** Ro 8.29; 2Co 3.18; Fil 3.10

* **4:22** Gn 16.15

* **4:22** Gn

jenah joinít, Arabia baácboó jumni Sinaí jeéboodíh jwĩ jenah joiná caá. Caán jeéboó Dios Moisésdih ã wutajidih át wũhup wat jĩ, jwĩ nuowã ĩ táí jepahat pínah niijná. Caán wutatdih jepahna, teo wũhñit pah ĩt jumup jĩ. Pánihna, Agar teo wũhñih mi jummat pah, jwiít cãacwã caán jeéboó ã wutajidih jepahíhñit, jwiítbut teo wũhñit panihñit jwĩ jumna caá. Páant ã jumuchah, caán Sinaí jee pánihni teo wũhñih Agar mit jumup jĩ. Pánihna, caánt teo wũhñih caán jee pánihñih mi jummat pah, buu Jerusalén tútchidih moón caán wutatdih jepahíhñit, mi jummená panihñit ĩ jumna caá. Pánih jumñit, queébtut biíc yoobó teo wũhñit panihñit jumna, Dios weh ĩ nihcan caá.

²⁶ Obohjeéhtih, teo wũhcannih Saraboodíh jenah joinít, “Majeéh bóli Sara newé weépdihi mi weh jumnipna caá”, Dios Abrahamdih ã niijátjidih jwĩ náhnina caá. Pánihna, Abraham Dios ã niijátjidih ã táí jenah joyátji pah, jwiítbut Cristodih táí jenah joinít jumna, Sara mi jummená panihñit jwĩ jumna caá. Pánih jumñit, Dios pebhboó jumni jáap Jerusalén tútchidih moon pánihñit jwĩ jumna caá.

²⁷ Dios naáwátidih naóh yapani Isaías jwĩ éet Sara ded pah mi yapatjidih jenah joinít, nin baácboó jumni Jerusaléndih, jeáboó jumni Jerusaléndihbut ded pah ã yapat pínahdih Dios át jenah joyát tútup jĩ. Caandíh jenah joinít, nin pah át niij daacáp tajĩ: “Weh wihcannih, búdí ma wẽi ñaacá. Weép jumna tubatdih jéihcannih jumna yuhna, ma weh jumnipna caá. Ma jummená dawá jumñit, meemdíh teo wũhñih mi jummená chah ĩ jumnipna caá. Pánihna, ma táí weñeé”, át niij daacáp tajĩ. *(Is 54.1)*

Páant niij daácnit, chah dawá mi jaimená ï jumat pínahdih naóhna, jeáboó jumni Jerusalén tútchiboó dawá Jesucristodih jepahnitji ï jumat pínahdih niij naóhna át chājap tajī. Agardih Abraham ā yohat pah nin baácboó jumni Jerusaléndih ï yohat pínahdihbut niij naóhna át chājap tajī.

²⁸ Pánihna, Dios ā niijátji pahjeh Sara wūh Isaac át cāac jumap wut jī. Pánihat pah, “Weemdih ma túi jenah joyát jīb, nihat baácdih moondih wā túi chājbipna caá”, Dios Abrahamdih ā niijátji pah, Cristodih jepahnit ñi jumachah, yeebdihbut át túi chājap taga. ²⁹ Queét chénewā ā wehdih ded pah ā yapatjibut jwiít dih nin pah ā bohéna caá: Dios ā niijátji pahjeh Túini Espíritu ā teo wáacachah, Isaacji át cāac jumap wut jī. Páant ā cāac jumachah ennit, ā úd jeñé Ismaeljiboó caandih enihcan, yeejép át chājap wut jī.* Būbut ā chājatji pahjeh jwī nuowā ï naáwátjidih jepahíh nitboó jwiít Cristodih jepahnit dih yeejép ïpī chājna caá. ³⁰ Páant yeejép ï chājachah yuhna, Moisés nin pah ā niij daacátjidih jwiít dih túi jenah joyát caá náahap: “Sara mi áa Abrahamjidih nin pah mi niijíchah, Dios át jepahat túutap wut jī: ‘Jwiít dih teo wūhni wūh, Ismael, míh bíi déedih ā jéih bíbohcan niít. Jwī wūh yoobát Isaacboó caandih ā bíboh bipna caá. Pánihna, jwiít dih teo wūhnihdih mi wūhjīh biáboó ma bejat túutá’, mit niijíp wut jī”, Moisés át niij daacáp tajī.* Páant ā niij daacátjidih jenah joinít, jwiít Isaac panihnit jwī jumachah, Dios caandih ā túi chājat pah, jwiít dihbut ā túi chājbipna caá. ³¹ Pánihna, wā déewā panihnitá, teo wūhnih Agar mi jaimená panihcan,

* 4:29 Gn 21.9 * 4:30 Gn 21.10

teo wāhcannih Saraboó mi jaimená panihnit jwĩ jumna caá.

5

Teo wāhñit panihnit jwĩ jumcatdih Cristo ã cádahat tútat

¹ Teo wāhñit panihnit jwĩ jumcat pínah niijná, Cristo jwiít dih át wun wūhup wut jĩ.* Páant ã wun wūhuchah, “Caandih túi jenah joiná, Dios biíc dih wā túi jumbipna caá”, niijnít, caandih ñi jepahap jĩ. Pánih jepahnit, “Moisés ã wutatjidih wā túi jepahachah, Dios weemdih ã túi enbipna caá”, ñi niij jenah joicá bojoó. Jesúsdih cádahcanjeh, túi wēp ñuhñit panihnit ñi jumúú. Pánih jumnit, bita ï wutatdih jepahcanjeh, teo wāhñit panihnit ñi jwúub waadcá bojoó.

² Weém, Pablo, nindih wā naáwáchah, ñi túi jenah joyoó: “Bóodnit jumna, Diosjeéh jwĩ túi jumbipna caá”, niij jenah joinít, ñi míic bóodat tútuchah, Cristo yeebdih ã wun wūhatji dedé pínah áta nihcan tagaá. ³ Búutéh wā niiját pah, wā jwúub naóhbiipna caá. Ded bóodat tútñiboodih nihat Moisés ã wutatjidihbut jepah beedáát caá náahap. ⁴ Diosjeéh túi jummat tút niijná, caán wutatdih túi jepahíhñit jumna, yeebjéh Cristoboodih ñi cádahna caá. Pánih jepahíhna, Dios yeebdih oinit, ã teo wáacatdihbut míic jāhna caá ñi chājap.

⁵ Obohjeéhtih, jwiítboó Túini Espiritu ã teo wáacatjĩh Cristodih jwĩ túi jenah joiná caá. Páant jwĩ túi jenah joyóchah, “Queét túinit caá”, jwiít dih

* 5:1 Jn 8.32-36

Dios ã niíj enna caá. Páant niíj ennit, ã pebhboó jwĩ jũibínachah, jwiít dih ã túut nuúm péabipna caá. Páant ã túut nuúm péanachah, táinit yoobát jwĩ jummat pínahdih jwĩ pãina caá. ⁶ Pánihna, jwiít Jesucristoíhwã bóodnit jumna, bóodcannitbut jwĩ jumuchah, Dios jwiít dih biíc yoobó ã enna caá. Cristodih táí jenah joiná, bitadih táí oinit, teo wáacnit jwĩ jumuchah ennit, Dios jwiít dih ã táí wëibipna caá.

⁷ Wã déewã panihnitá, yeéb Cristodih ñi táí jenah joyóp yuh jĩ. Obohjeéhtih, táini dooná yoobát dih ñi táí jenah joyóchah yuhna, ¿déhe tibeé yeebdíh cádahat túutni? ⁸ Dios yeebdíh ñioniboó queétdih páant át naáwát túutcan tagaá. ⁹ Nindih ñi náhninaá: Búdí pan pínahdih ã paa béjat pínah niijná, bainíbit paáát túutnijeh ã náahna caá. Pánihat pah, wã túttimah jũóhnit, yeebdíh mácah ĩ bohénachah, daocánnit yuhna, dawá yeebdíh ĩ túut nuumát túutna caá.* ¹⁰ Obohjeéhtih, jwĩ Maáh Jesús dih wã táí jenah joyóchah, weemdíh weñanit, nin pah ã niíj jenah joyát túutna caá: “Jwĩ Maáh queétdih ã táí teo wáacipna caá, queétdih mácah ĩ bohéat dih cádahnit, wã bohéatjidih yoobópdih ĩ jwũub jenah joyát pínah niijná”, ã niijná caá. Obohjeéhtih, ded yeebdíh yéejaniboodíh Dios búdí ã peéh chãjbipna caá.

¹¹ Wã déewã panihnitá, queét mácah naóhnit weemdíh nin pah ĩ niíj yeena caá: “‘Bóodat túutnit, Diosjeéh ñi táí jumbipna caá’, Pablo ãpĩ niíj naóh bohéna caá”, ĩ niijná yuh caá. Páant wã bohénachah nihna, queét weemdíh yeejép ĩta chãjcan tagaá.

* 5:9 1Co 5.6

Obohjeéhtih, cruzboó Jesucristo ã wun wãhatjidih wã bohéat peéh weemdíh ï jũihna caá. ¹² Pánihna, bóodat túatnitboó, yeebdíh yeejép ï chãjat peéh, biáboó ï beje naáh.

Oina, wãtatdihbüt jwĩ jepahat

¹³ Wã déewã panihnitá, “Wã wãtatdih jepahna, wãjeéh ï túi jum̃bipna caá”, Dios yeebdíh ñíonit, ãt niij jenah joicáp jĩ. Obohjeéhtih, watnit panihnit jum̃na, “Bũũ caán wãtatdih jepahcan, ded pah yeejép wã jenah joyát dihjeh wã chãjbipna caá”, ñi niij jenah joicá bojoó. Páant niij jenah joicánjeh, búdí oinit, ñi túi míc teo wáacá.* ¹⁴ Moisésjiboó nin pah ãt niij wãtup jĩ: “Meém mícjeh ma míc oyat pah, bitadihbüt oinit, ma túi teo wáacá”, ãt niijíp jĩ.* Pánihna, bitadih túi oina, nihat biíh ã wãtatdihbüt túi jepahna caá jwĩ chãjap.* ¹⁵ Nuñáp wã ï míc chãacát pah, mácah bohénitdih joiná, yeebjéh büt tubit míc jũihna caá ñi chãjap. Páant ñi chãjatdih cádahcan, yeebjéh ñi míc yéjea beedábipna caá.

Túini Espíritu ded pah jwiít dih ã náah yacat

¹⁶ Nin pah yeebdíh wã niij wẽp naóhna caá: Túini Espíritu ã teo wáacatjĩh ded pah yeebdíh ã náah yacat pahjeh ñi túi jum̃ú. Pánih jum̃na, yeejép ñi jenah joyát pah ñi chãjcan niít. ¹⁷ Ded pah jwiítjeh yeejép jwĩ náahatdih chãjna, Túini Espíritudih en jũihnit dée pah jwĩ jum̃na caá. Caán ã náah yacatdih chãjna, jwĩ náahatboodíh jwĩ chãjcan niít. Páant ã jum̃uchah, ded pah yeejép jwĩ jenah joyát dihjeh chãjcan, Túini Espíritu ã náah yacatdih chãjat caá

* 5:13 Mt 20.26 * 5:14 Lv 19.18 * 5:14 Ro 13.8-10

náahap.* 18 Túini Espíritu ded pah ã náah yacatdih chãjnit jumna, “Diosjeéh wã túi jummat túut ni-ijná, Moisés ã wutatjidih túi jepahat caá weemdih náahap”, ñi niúj jenah joicán caá.

19 Diosdih jepahcannitboó yeejép ã jenah joyát dihjeh chãjnit, nin pah ã chãjatdih jwiít nihat jwĩ jéihna caá: Yéej chãjnit, yéej chãjatdih jenah joinít, tíic jenah joicánjeh íí náah chãjnit ã jumna caá. 20 “Nin weemdih teo wáacni caá”, Dios yoobát nihcannidih niúj wēinit, jióhñit, míic eníhcannit, míic jũihñit, bita ã bíbohatdih en ñinahñit, waícanjeh íijnit, bitadilh teo wáacatdih jenah joicánjeh, queétjeh maáta pah jenah joinít ã jumna caá. Míic en jũihñit, tútchi wahnit, “Yeéb mácah moón caá”, niúj en jũihñit ã jumna caá. 21 Bita ã túi jumachah en íijnit, máihñit, máihñatdih yaádh metatdihbut bidnit, búdí babhbat dooná jummat joiná wēinit ã bejna caá. Pánihat caá yéej jenah joinít, ípĩ chãjna caá. Játi h yeebdih wã niiját pahjeh, buubut wã jwúub niúj naóhna caá: Det páni h chãjnit Dios ã maáh jumupboó ã jéih jumcan caá.

22 Obohjehtih, Túini Espíritu ã teo wáacatjĩh nin pah jwĩ jumna caá: Dios jwiít dih ã oyatdih jéihñit, túi wēinit, jwiítbut bitadilh jwĩ oina caá. Humcan, túinijeh jwĩ jumna caá. Yójahcan, ded pah bita ã chãjachah yuhna, queét dih waícanjeh íijcan, túinijeh jwĩ jumna caá. Bitadilh túi teo wáacnit, túi chãjnit jwĩ jumna caá. Diosdih, cãacwãdihbut ded pah jwĩ niijátji bíic yoobó péanit jwĩ jumna caá. 23 “Weém chah jéihni wã jumna caá”, jwĩ niijcán caá. Ded pah yeejép chãjat jenah joyát ã jũúwáchah yuhna,

* 5:17 Ro 7.15-23

caandíh joyáh bojnit, jwĩ chãjcan caá. Páant jwĩ chãjachah ennit, “Moisés ã wutátjidih jepahcan, queét yeejép ĩ chãjna caá”, det ĩ jéih niijcán caá. ²⁴ Jesucristoíhwã jumna, yeejép chãjat jwĩ jenah joyátjidih jwĩ jepah cádahap jĩ.* ²⁵ Pánih cádahnit, Túini Espíritu ã náah yacatboodíh wēi jepahnit, jwĩ chãjat dée caá.

²⁶ Pánih chãjnit, “Wã déewādih chah wã jéihna caá”, niij jenah joicánjeh, jwiítjeh jwĩ míic íjacan, jwĩ déewã ĩ tái jumuchah ennit, jwĩ en íjca bojat dée caá.

6

Jesúíhwã ĩ míic teo wáacat

¹ Wã déewã panihnitá, ñi tái míic teo wáacá. Pánih míic teo wáacnit, biíc ñijeéh jumni ã tái chãjcatdih ennit, Túini Espíritu ã teo wáacatjĩh caandíh ñi tái míic wéhenaá, túut numnít, táinijeh ã jwúb chãjat pínah niijná. Pánih teo wáacnit, yeéb míicjehbut ñi tái chãja chaáh, “Yeejépdih chãjna”, niijná. ² Ñijeéh jumnit yeejép ĩ yapachah enna, queétdih ñi teo wáacá. Pánih míic teo wáacna, Cristo ded pah ã náah yacatdih jepahna caá ñi chãjap.

³ “Bita chah tái chãjni jumna, dedé teo wáacatdih wã náahcan caá”, ded niij jenah joiná, caanjéh míic yeena caá ã chãjap. ⁴ Ded pah ñi chãjatdih jenah joinít, “Nin túini caá. Caán yeejép caá”, niij jéihyat caá náahap. Pánih jéihna, ded pah ñi chãjat túini ã jumuchah, bitadih ded pah ã yapatdih jenah joicánjeh, ñi tái wēibipna caá. ⁵ Jesús jwiítidih ded pah ã náah yacatdih jepahna, jwĩ jepahcahbut

* 5:24 Ro 6.3-14; Gá 2.20; 6.14

jwiítjeh jwĩ ñíwat pínah ã jumna caá. Bitaboó jwiítidih ñ jéih ñío wũhcan caá.

⁶ Det túini doonádih bohénitboó queétdih naóhndih ñ túi teo wáaca naáh, dedé ã náahatdih ã bíbohat pínah niijná.

⁷ Ded pah jwĩ chãjatdih jenah joinít, nindih náhníat caá náahap: Jwiít cãacwãboó dedédih jwĩ momochah, caanjéh ã jwũub chíih jũúwúchah, caandíhjih jwĩ bíbohbiipna caá. Túinidih ñíonit, jwĩ momochah, túini ã chíih jũóhbiipna caá. Obohjeéhtih, yeejépnadhi jwĩ momochah, táicanni áta chíih jũóh tagaá. Pánihat pah, jwiít cãacwãdihbut biíc yoobó ã jumna caá. Ded pah jwĩ chãjachah, biíc yoobójeh muntih jwiítidihbut ã yapbiipna caá. Ñi túi náhninaá, Dios nihat jéihndih jwĩ jéih tíohcan caá. Pánihna, “Weém wã túi chãjcatdih Dios ã encan caá”, ñi niij míic yeeca bojoó.* ⁸ Ded ã weñat pínahdihjih chãjna, yeejép ã chãjachah, ã yéej chãjat jíib, iiguípna ã bejbipna caá. Obohjeéhtih, ded Túini Espíritu ã náah yacatboodíh jepahna, ã túi chãjat jíib, páantjeh Diosjeéh ã jumbipna caá. ⁹ Dios ã jenahat láa, túi chãj cádahcan, túinidih jwĩ bíbohbiipna caá. Páant jwĩ bíbohat pínahdih jéihnit, túi chãj chũucán, jwĩ cádahca boj jíih.* ¹⁰ Dedé teo wáacatdih ñ náahachah, jwĩ bũujáát pah bóo, nihat cãacwãdih jwĩ túi chãj jíih. Jwĩ déewã panihnit Jesúhwãdih bácah, chah jwĩ míic túi teo wáacat dée caá.

Pablo naóh péanit, ã túyat tútat

¹¹ Nin núodih wã chéen ã daác wũhup be. Pánihna, nin péeni naáwátidih dahwani wã

* **6:7** Pr 22.8; Os 8.7 * **6:9** 2Ts 3.13

daacátdih ennit, “Pablojeh jwiítdih át daác wahap taga”, ñi niíj jéihbipna caá.

¹² BHH queét yeebdíh yee bohénitdih wã jwáub naóhbipna caá. Queét yeebdíh bóodat túutnitboó jwí déewã queétdih í wēi enat pínah niijná, páant í bohéna caá. Jesús cruzboó ã wun wāhatjidihjeh bohéna, queétdih jūihnit, jwí déewã yeejép íta chāj tagaá. Páant yeejép yapatdih náahcan, queét yeebdíh í bóodat túutna caá. ¹³ Queét bóodat túutnitboó Moisés ã watatjidih túi jepah beedácan yuhna, yeebdíh caandíh jepahat túutnit, í bóodat túutna caá. Bitá jwí déewã “Queétboó Gálatasdi moón Jesúíhwādh ít túi bóodat túutap tagaá”, queétdih í niíj wēi naáwát pínah niijná, páant í bohéna caá. ¹⁴ Obohjeéhtih, cāacwã weemdíh í túi wēi naáwát pínahdi weémboó wã bidcan caá. Pánih bidcan, jwí Maáh Jesucristo cruzboó ã wun wāhatjidihjeh cāacwã í wēi naáwát pínahdi wã náah yacna caá. Weemdíh ã wun wāhachah, nemép Dioíh nihcannitdih yeejép ã chājat túutachah yuhna, weémboodíh ã buujácan niít. Páant yeejép í chājachah yuhna, wã en yaccan niít. ¹⁵ Jwiít Jesucristoíhwã jumna, Dios jwiítdih ã enechah, bóodnit, bóodcannitbut jwí jumachah, biíc yoobó dedé pínah nihcan caá. Obohjeéhtih, táiniboodíh jwí túut numúchah ennit bácah, búdí yoobát ã wēi enna caá.*

¹⁶ Nin wã bohéátdih túi jepahnit, Diosjeéh úumcanjeh ñi túi jumú. Dios yeebdíh jīgah ennit, ã teo wáaca naáh. Biíc yoobó ã teo wáacat pínahdi nihát áihwādh wã náah yacna caá.*

* **6:15** Jn 3.3-7; 2Co 5.17 * **6:16** Sal 125.5; 128.6

¹⁷ Nin wã pée naáwátbit caá: Jwĩ Maáh Jesúsdih teo wũhni wã jummat jíib, weemdíh ã puñat yahwítji páantjeh wĩih bácahdih wã ðuoná caá. Páant yaoh ðuoní wã jumachah ennit, “Pablo Jesúih túini doonádih Dios ã naáwát túutni nihcan caá”, weemdíh ã jwũb níj tac buugáca bojo naáh.

¹⁸ Wã déewã panihnitá, jwĩ Maáh Jesucristo yeéb nihatdih búdí oinit, ã túi teo wáaca naáh. Pánih náah yacnit, yeebdíh búdí oinit, wã túyat túutna caá.

Páant bóojeh tigaá wã daacát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

xxx

PDF generated using Haiola and XeLaTeX on 21 Feb 2024 from source files
dated 29 Jan 2022
34c9543b-57a6-5290-ab7b-4fa15529a7e2